

四庫全書

集部

欽定四庫全書

集部

御定歷代賦彙卷

八十九
九十

詳校官檢討_臣劉炘

主事銜_臣徐以坤覆勘

總校官編修_臣王燕緒

校對官中書_臣潘曾起

謄錄監生_臣任鑑

欽定四庫全書

御定歷代賦彙卷八十九

舟車

船賦

晉
裒據

伊河海之深廣兮嗟繇邈而無垠彼限隔而靡覩兮此
由茲而莫聞雖后土之同載兮實殊代而乖分嘉聖王
之神化兮理通微而達幽悼生民之隔塞兮愍王教之
不周立成器以被用兮因垂象以造舟濟凌波之絕軌

兮越巨川之懸流水無深而不渡兮路無廣而不由運
重固之滯質雖載沉而載浮飄蕪鼎於吳會轉金石於
洪濤溯無涯之浩浩不抑進而輟兮登陽侯之激浦兮
方魚翔而龍遊雖滔天而橫厲長抱樂而無憂且論器
而比象似君子之淑清外質樸而無飾內空虛以受盈
乘流則逝遇坻而停受命若響唯時而征不辭勞而惡
動不偷安而自寧不貪財以徇功不愛力而欲輕且其
行無轍跡止無所根不疾而速忽若馳奔豐儉隨乎質

量所勝任乎本形雖不乘而長浮每涉險而必正周遊
曲折動與時併博載善施心無所營囊括品物受辱含
榮唯載涉之所欲溷貴賤於一門包涵通於道德普納
比乎乾坤感斯用之却廣信人道之所存

舟賦

唐
常暉

昔者帝軒君臣道叶剡木爲舟剡木爲楫洪水以之徑度
大川於焉利涉疑夏日之初蓮似秋風之落葉動而必利
其物居而必虛其心善蘭桂之得性惡泥滓之陸沈清

流澈影岸狹波深直容與而孤運非軌轍之能尋動而何極居而不測以謙虛而受盈尚樸素而思飾爲而不有質而能力不以克己辭於功不以利物矜其德夫潛行不離於水有似智焉虛已以濟於物有似仁焉不畏蛟龍之浦不恥魚鼈之泉任規模於匠者隨物理之推遷橫不測之流無慙於勇決指送歸之路有類於神仙爾其渡遼按甲伏波受命絕島如雲長川似鏡值衝風之颯起引孤帆而高映榜人奇唱樵聲不一赴海凌川

箭馳風疾臨地角而長逝望天涯而迴出飄飄畫鷁決
孤影而排風迢遞檣烏轉危竿而就日且夫履有常道
濟無不通嘉守義於共伯慙棄人於衛公安而不傾得
性江湖之上悠哉獨運託質浮沉之浪爲用也大爲德
也廣操檝則津女輕歌畫土則廩君孤往襄城帶其寶
劍神亭飛乎銀仗惟傳巖之版築臨巨川而長想

大舟賦

唐
常暉

崇崇大舟內豁訝而坑谷外突兀以山丘長百尋受萬

斛淺淮泗滯原陸兀若簸大海以出鯨魚邈如漂崑崙
而橫地軸及縱大壑鼓雄風疊高濤摩蒼穹連山業於
天外疾雷吼於地中當此時也忽然湧出漫若乘空挺
無何之鄉樹摩天之檣檜櫂不舉雲帆高張平林倏閃
以藏沒羣島飛動而相望兩儀混沌萬象渺茫崇山成
秋毫滿月猶隙光一日二日經岷峨而歷扶桑外甚馳
驚中唯虛閒所以望之者勢同纍卵居之者安如泰山
借如唐堯洪水大浸桑田包山上陵刮地滔天無巨舟

矣人其魚焉有若漢武習戰羽衛雲陳鑿昆明者四十
里坐豫章者一萬人夫其爲大與世殊倫暨乎巨象初
來輪困其貌錙銖犀兕蟻螳貌豹向非刻舟鑒其淺深
殆輕重而難較岑彭西伐杜預南征千里江漢二軍甲
兵若非廣艘弘舸何以蜀滅吳平稽前代之爲用信殊
塗而同軌以古況今相去遠矣何者我后無唐堯洪水
懲漢武昆池笑魏家秤象偃晉國興師則大舟之用殊
於昔時今乃守在海外化漸無垠浮三江以實倉廩遠

四溟以周乾坤既而飛鳳詔宣鴻恩或西盡月窟東臨
朝暾南國徂遊北極馳奔窮水路以適遠為大舟之用
存於戲向者將逝萬里之外滯一曲之內故知德有所
長皆以拙于用大今以濟渡為功適天下而皆通假其
風水之力不離江漢之中向使移舟為人以海為主元
首契合大舟夾輔則傳說之濟川同功軒皇之剡木何
取客有扣舷而歌曰是舟也非大匠則無以成非大水
則膠而傾非大風則道不行此皆大匠之則大海之德

一日千里者風之力也

剡木爲舟賦

以濟川資舟理
國求賢爲韻

唐

羅劬權

昔王者以濟衆爲先念舟航之未具長川謂運斤之人
必能造物選合抱之木遂使攻堅旣而削彼鱗皴定茲
繩墨短長大小任規模之巧心高下重輕稱波瀾之巨
力原夫造其舟而利其用亦由求其理而安其國剡劂
斯休舳艫已流小周穆鼉鼉之駕契高宗舟楫之求德
合國風暗動揚帆之勢入歌帝力爰成鼓棹之謳濟物

不得無其舟行化不得無其相運智既由乎明主操舟
亦因乎哲匠器無不具實均大造之功道無不通宛叶
蒼生之望必也主意湫瀾用汝猶疑不顧斧斤之妙不
求擁腫之資則思涉之人恨無航而空嘆未濟之士欲
行水而何期且刻之求劒者其意細微用之稱象者誠
非大計曷若濟巨川而是念命良工而立制欲使蠻
夷之類慕化而有路斯來商賈之徒通貨而乘流遠逝利
涉之道彌彰拯溺之功潛契以此利物何物不利以此

濟人何人不濟由是皇恩遠被鴻化旁流潛通四海
之路皆因一葉之舟用之則行豈隨波而上下利有攸往
當與道而沉浮今我后契道臨人端默求理思通大水
濟川之具雖多樂得長材剡木之心未已則知從古之
君爲舟於水若葦杭於河廣之內似芥葉於坳堂之裏
方之於今未足喻其大而擬其美

汾水新船賦

以虛舟濟物利
涉大川爲韻

唐

徐彥伯

賢者徹侯求人之莫分帝之憂以爲冀方輪轉病於行

輶乃乘素秋鏡清流假道於河伯息肩於吳牛因去彼
以取此遂舍車而造舟革故鼎新裁規創制通子房之
妙略運弘羊之潛計則淺深之量將載沉而載浮陳去
就之宜則既濟而未濟懿夫席帆錦纜蘭橈桂楫不日
而成嘉謨允叶蒲且罔設寧勞漁人之家財用無虧不
奪農人之業水之積也厚船之動也捷迴翔並驚識波
上之雙鳬倏忽孤飛見天邊之一葉伊負重以致遠非
抑否而人涉及夫安卑委順外靜中虛混泥沙而閑矣

象智者之居諸遂便乘流排難觸物泛波濤之不屈狀
勇者之拂鬱船之時義吉無不利向之爲材也標挺特
之材今之爲器也作殊常之器若往若來無顛無躓奢
淫自戒厭殷帝之酒池遊戲無虞恥丹朱之陸地鷁首
翩然魚鱗比川映汾陰之寶鼎參漢武之樓船當秋風
之擢唱候明月以扣舷載康儲而奉國達方物以朝天
可以通河渭可以泝涇澠斯漸勞而永逸將冠古而爭
先且知君子攸作務於遠大美利亟行莫不繫賴厥聲

載路賡歌濟巨川之功史不絕書考課獲疇庸之最別
有荷爲衣兮蕙爲帶鼓輕柅兮張翠蓋杳眇煙波之末
夷猶區域之外願一涉於龍門接神仙之嘉會

進舟賦

有序

明何景明

予使於滇行將萬里所越皆崇山複嶺以輿以馬顛頓
馳跋而不任其勞至永寧乃謀舟以歸庶代陸走之勤
時霜降石出江狹水迅機發矢激其勢不得少留甚懼
之有老篙師進舟意頗閒自招於前一人柁於後柁者

左右緩急不敢自任視諸老篙師老篙師者額之指之
目之而左而右而緩而急無不應者其舟之敬正疾徐
皆與水勢宜不爲岸防不與石鬪予甚安焉問曰爾之
爲舟將有道乎老篙師執篙進曰有敢請言之夫待用
者器也器不良則不稱用用之者吾之手足耳目口也
少怠即不能用手足耳目口役於心者也心不專則手
足耳目口不爲用招與舵吾之器也左右緩急敬正疾
徐吾之用也故吾先良吾器以利吾用手足耳目口不

敢少怠心不敢少弛然後從容乎安流蕩激於奔涌洄
湫之中而無虞也然吾又能察水性與勢故夫潭淵淺
渦暗灘隱石者吾遠而認之能得於十數里之外是以
預爲之備而不至損吾舟他水土常惡遲取速截長要
短故有敗者吾惟順其水道而無所枉雖遲而得免敗
焉吾之道如此已矣予謂舟御類藝也人之於世顧藝
之不若哉因序其言爲賦以自勵

惟孟冬之既朔兮霜凜凜而下威冰汨汨以斂壑兮草

木蕭索而變衰念固陰之初升兮撫歲華之漸微倦行
邁之靡靡兮飭舟師於水渚操吾楫以徑濟兮石凌兢
而參差流漂激而不馴兮勢百折而靡隨響訇磕而蕩
潏兮若弦控而矢馳彼垂堂固有戒兮心悸怖而內疑
何舟師之有神兮善審勢而明機視柁者以發縱兮引
吾招以先之量左右以中繩兮察緩急之所宜疾徐敬
正各有矩兮曾不失之於毫釐赴迅波以示捷兮制狂
瀾之既危始委折若有避兮亦橫衝而弗辭既因順以

安常兮復扼險而呈奇值澎湃而稍待兮入洄洑而靡
遲預崖石而逶迤兮利水性而莫違夫執藝固道之所
寓兮予安知其所持曰吾心以爲之宰兮實操運之權
衡衆體苟不勤兮人安用之足勝才良而器利兮乃任
使之可能志兮靜而臨之兮誠易心之是乘震撼擊撞
固多端兮心應之而遂平寧拙遲而不巧速兮非枉道
而兼程推是術而處之兮雖夷險而同情嗟世俗之止
措兮胡茲技之不侔進惘惘而獲咎兮退熒熒而見尤

過之則犯忌而招戾兮不及者誠可羞蹈履之不少檢
兮或語默而嬰憂左右前後無方兮昧上下之所由顛
必至於觸藩兮智或流於刻舟入汙漫而莫極兮汎沛
濺而罔留泥軌度而局促兮放準墨而外求忽蒼黃而
莫辨兮動齟齬而莫投孰佩弦以自剛兮焉佩韋以自
柔繫予之未進兮匪取教於一方夫細大之不可捐兮
感曲藝而不忘矧岐路之異態兮平地固有吕梁觀要
津之沓駁兮涉宦海之汪洋懲往塗而省究兮吾庶以

慎吾杭

一葉浮萍賦

有序

明
謝常

包山木石先生徐庭栢讀書世家也器宇卓犖神采脩然望之如神仙中人嘗與二三同志泛舟於具區採菱芡酌濁醪歌范少伯之詩而娛其情遂號其舟曰一葉浮萍吳中以詩鳴者爲之咏歌余雖年邁亦撰賦一通爲木石先生之贈也賦曰

稽山樵朝發蹤於東海夕將抵乎西都遇茫洋之大澤

勢滔涵乎太虛爲吳中之勝境實天下之名區以爲洞
庭邪則層樓不見翬飛乎岳陽君山不見列翠乎蒼梧
以爲彭蠡邪則瀉不見銀河九天之瀑布而張不見屏
風九疊之匡廬於是西瞻茗嶺東望姑胥然後知其名
見於禹貢而爲揚州所轄之太湖邪是時也日落蒼灣
煙澹平蕪恍東山之月出見木石之鴻儒停桂櫂而揖
余言曰吾將告子太湖之所以得名演子以太湖之大
義子將樂而聞之乎是湖也三州之界四方之迂其東

也則百里之已越其西也則億弓之有餘其南也則一望之是遠其北也則萬頃之無虧故東其半為蘇臺之境西其半為雪水之隅北其半為常郡之限南其半為松陵之拘三州太湖之得名其以此與古老相傳信而不誣原其始則夏禹之底定而衆水皆匯乎此潏然亦安知其不濫觴於崑崙之頂泄瀚海而來尾閭者邪乃若微波不興一碧萬頃如青銅之淨拭似白練之平鋪颺風倏起長鯨怒呼拔銀山之千尺撼驚濤之雪如使

觀者不覺心戰而膽慄頃刻覆行人之舳艫其產則有
辛夷杜若菡萏珊瑚大寶之貝明月之珠春水桃花之
鰕秋風蓴菜之鱸白頰奪淮南之風味紫蟹剖吳下之
膏腴又有魚鱗之屋水晶之居其深莫測其奧莫闕構
波神之窟宅作馮夷之幽都既有凌波之仙子豈無騎
鯉之神夫月白風清似或聽廣樂鈞天於縹緲雪消雨
霽恍若見金支翠旗之有無散落霞錦光於鼎瀡濯殘
陽紅纈於扶疎玉宇涼生則足以試太一乘蓮之渡綠

雲曉漲則足以供漢陰抱甕之斟惜杜少陵空有漢陂
之樂曾不及此一覩李謫仙空有采石之泛曾不及此
一趨故凡遊乎此者自有以得其樂又何必渡黃陵而
遊赤壁隔滄海而望翠蓬與玄壺也哉吾今於是求舟
楫於蘭桂編蓬帆於菰蒲一葉浮萍之是扁百年奕世
之不污輕於杭葦穩勝乘桴效天隨子之蕭散采芝叟
之清臞韜光於草澤混跡於江漁短櫂輕橈紛總總乎
湖山之樂長鎗大劒不屑屑乎雲臺之圖披羊裘於風

雨恣綸竿而卷舒仰清風於桐江釣雲之嚴子慕高名
於石湖載月之陶朱張騫八月之槎枏泛斗牛之渚純
陽三尺之劒空過洞庭之湖詩卷酒杯以備怡情之具
筆牀茶竈聊爲適興之需紅蓼白蘋處同羣而作侶汀
鷗沙鷺每相狎而相呼鼓腹而歌濯纓之句扣舷而誦
玄真之書喜問津之有託藐浮海之爲愚雖有志乎蓑
笠亦不棄乎簪裾實南州高士之苗裔匪武陵隱客之
流徒今吾幸有此樂孰云誕而爲迂是則向之太湖不

獨有異芳靈物之產神仙巨靈之宅抑且稱中吳人物
之遊亦吾祖宗之世居也語畢木石先生鼓泄波間倏
然而去飛玉龍之一聲撼金濤於別浦折風木於太湖
八百之西灣不覺七十二峰翠鸞之掀舞紛落葉以相
觸灑蓬牕之急雨起而視之則夜將曉雞三鳴更四點
月已墮海西丈五矣於是叱湘靈捧硯命洛神展素援
湘玉一枝於碧天蘸蟾宮九秋之涼露想木石與余問
答之前言而遂寫為一葉浮萍之賦

車賦

梁
甄玄成

鑄金磨玉之麗凝土剡木之奇體衆術而特妙未若作
車而載馳爾其車也名稱合於星辰圓方象乎天地夏
言以庸之服周曰聚焉之器制度不以陋移規矩不以
飾異古今貴其同軌華夷獲其兼利爾其利也天子以
郊祀田伐諸侯以朝聘會盟庶人以商農工賈夷狄以
致蓄遷生爾其作也均輕重而攻材正陰陽而斲木既
中正而合剖亦面勢而審曲候離婁之督繩須公輸而

削墨布骸服之有定施爪牙之不忒既涉用於牛馬亦
受名於羊鹿爾其容也侔蓋樹之獨立似高雲之出
嶽獨映水也如舞鸞之對鏡衆行陸也若翔鴻之赴遠聽
長響之轉轉望遙儀之婉婉信有美兮宜比興徒欲貌
兮不能辨及其駕也堅珊瑚之駐引絕羣之駁既絲勒
之縈頭亦銅鉤而瑩角始向輓而龍轉就入轅而獸躍
或軋軋而鳴鼻或參差而動脚咆哮歇轉鬱怏墮閣見
輪陰之翻亂視帶影之飛泊及其乘也或方夏虐暑炎

氣歎烈浮慙動以來風輕紗飛而去熱纖埃著而即墜
煩氣衝而受歇或固陰沍寒祁嚴凜厲複帷下而前屏
重檐垂而後蔽霜露侵而靡及風颺激而不戾或油雲
雨霈中遠半恢宏宇宙而雷奔杼軸割而去衍被洪流
染而自落散水湔而不霑

指南車賦

唐
張彥振

緬窺皇始傾聽巢風時儀撲略化跡冥蒙結繩云謝徽
章漸通乃服牛而乘馬爰斲木而觀蓬故聖人因象以

制器隨物而興功北斗在天察四時而行度司南在地
表萬乘之光融爾其法制奇詭神妙無窮見其指而皆
知其向覩其外而莫測其中輪須藉於奚子妙乃發於
周公觀夫作也局關脈湊衡樞星設煙縈電轉鬼聚神
滅離朱目亂計然思絕公輸服其心工王爾慙其手拙
雖詞給而口敏終難得而縷說至如帝容順動王塗允
泰二月東巡萬國南會羽衛出而天動笳鼓鳴而雷磕
司南於是備屬車引行旆候薰風而進指仰卿雲而乘

蓋超搖光景之中縹緲煙霞之外同夫越鳥常有意於
南枝異彼魯人竟無情於殿最惟皇明之遠矚驅八駿
以遐舉既訪道於襄城亦尋仙於海渚豈須老馬之智
寧藉小童之語賴我司南不迷其所伊司南之用薄逢
國道之昌平就日月於天路聞簫韶於玉京常使朝朝
承北闕何辭歲歲指南行

大章車賦

以上方所造間
次羽儀為韻

唐

張彥振

舜為君兮禹為相七政齊兮八風暢備禮容兮和樂章

同車書兮一度量龍樓恭已則無爲以垂衣鸞蹕豫遊
或有時而端望伊大章之攸作冠輪輿而爲上其始也
委材質於資斧授規模於梓匠其終也援桴鼓於天街
動輶輶於霜仗乃畫界疏疆正位辨方候之以節步先
之以啟行象雷而鳴曾不聞其霆轟如蓬之轉終不見
其飄揚遵彼坦塗違茲險阻勿忘情而習靜殊不知其
處所類智者之行藏同至人之默語歷代傳寶鼓車逾
好有異人謀究同靈造行不由徑動能合道向使貴賤

混并高卑不問應無迷遠之疾詎有窮途之患則是大
章爲器國容之利指方位於遙空數田里於厚地節六
鼓以鼉駭首五輅而鱗次望塵不及初非千里之遙聽
響爭先終欣一日而至夫然則可以式序秩宗發揮樂
府扶持輦轂隱翳千羽以家形國何一二之能談自邇
陟遐雖萬億而可數墨客胡爲來攀桂枝懸鼓待鳴仰
淳淳之風俗尅車就駕識穆穆之威儀伊可大而可久
諒斯焉而取斯

蒲輪賦

以安車禮
賢者為韻

唐

王起

王者崇招隱之禮作徵賢之車既斲輪而合度亦安蒲
而用諸將使丘園共資巖穴皆虛則必旌其重貺建此
大輿輪合大規取邁而行陸蒲兼柔質取坐以安居罔
覆其軌轍可歷於丘墟載以歸朝盡是漸鴻之翼駕而
出野方隨繫鶴之書恒翹翹而隱隱諒求士之本歟若
乃山騁異人林棲隱者鳥獸之羣方雜薜蘿之衣未舍
或屠釣而忘名或版築而在野恥芟芟之帛厥禮未崇笑

予子之旌好善猶寡然後時主仄席哲匠精研載脂
載牽旣攻旣堅蒲也採陂澤之叢有車之用輪也斲陰
陽之木如日之園轡轡兮出中朝之禮盛麟麟兮入外
野而光宣於是經營草澤輶轡雲煙瞻其儀無虧乎翼
翼聆其響且異乎闐闐可以出嘉遁之碩德可以載傲
俗之遺賢空谷有車自爾而方絜鳴臯者鶴假我而聞
天豈獨邀申公於是日徵釣叟於昔年則知輪之設蒲
巖局是啓將毗王者之政先保賢人之體至萬里之安

安成百僚之濟濟豈比夫織而爲席表臧孫之不仁緝以成宮昭令尹之非禮方今儻已在官輪猶未安傍搜叢桂遠掇幽蘭士不病於邁種賢盡出於峯巒是蒲輪之禮也乃王化之端而已哉

蒲輪車賦

元
莊文昭

漢武受圖踐阼云初旣表章乎六經遂延攬乎羣儒重之以玉帛之禮安之以蒲輪之車於以明崇德之盛典將以贊至治之嘉謨猗歟蒲輪之爲車也象乾製蓋法

坤爲輿雙輪同雙曜之並行杠轂與列宿而相符材良
伊何梧檟梗櫓梓匠誰歟輪扁公輸準軒轅之規矩繩
奚仲之範模匪飾軫以金玉匪華轂以丹朱欲安之而
又安乃護輪以越蒲是知蒲之在輪也以待賢而見貴
車命蒲輪也以養老而名殊木輅庶可以媲其渾堅魚
軒不足以擬其安舒當其萬幾之餘九重深居寤寐求
賢與物來蘇感趙綰之薦進契淵衷而式宇廼遣皇華
周爰咨諏貢丘園之束帛起空谷之白駒龜蒙之區少

皞之墟迎鶴髮之鴻碩膺幣玉而來俱有司勸駕爰方
啓塗想夫是車之旣御也兩駟鴈行六轡如濡旣安且
固不亟而徐遵賢路而靡震靡迹範往聖而載馳載驅
如輕如軒於以尊公之壽無反無側於以寧公之軀涉
險巖其如砥歷艱阻兮如康衢始發軔於東魯繼釋轡
於西都觀光華於上國聳觀瞻於里閭待詔乎金馬之
門宴息乎承明之廬龍墀天開龍顏悅愉有來蒲輪照
耀金鋪司閤之所未識近侍之所睢盱謂尊賢之隆禮

誠曠代之攸無迨夫公之既至也逢掖其裾章甫縈紆
鳩杖從容鏘鏘步趨天子乃降陛未央致禮勤劬延細
羶而論道蔭廣厦之渠渠蒙當宁之清問意比德於
都俞偉耆老之篤論顧力行之何如豈空言之諄複茂實
行而崇虛何武皇之多慾竟弗庸而見疎惜名實之不
副羌終始之有渝宜乎千載之下重爲是車而嗟吁洪
惟聖元之撫運也六龍馭天一統車書帝德廣運澤被
海隅士顧登於天府民樂育於華胥不待夫蒲輪之迎

而共爲帝臣不假夫束帛之聘而文德誕敷士之席珍
待聘懷瑾握瑜者固已拔茅彙征鼓舞鳶魚致吾君於
堯舜躋斯世於唐虞嗚呼以聖朝而視漢武蒲輪之徵
士誠美玉之與珉珞者乎

蒲輪車賦

元
鞠志元

偉哉漢武之建極也風雲六合宇宙一春銳求賢於草
野爰有事於蒲輪厥制伊何采蒲以飾分水澤之芳馨
割溪毛之柔質始編席而陸離終裹輪以稠密

原本闕
十字

層

紋玉潤一規翠濕清芬遠勝於管茅柔滑無傷於土石
制之圓兮若月暈於空行之活兮如水旋於壁觸堅絕
鏗磕之驚越險無杌隄之失駕四牡兮駢駢乃載驟而
載轆踐太行之雲兮悠悠輶平原之雨兮翼翼雖道路
之驅馳勝行窩之安逸睠彼申公卜築龜蒙高蹤邈邈
清譽淜淜山中雖龍卧以肥遯搢紳特鶚薦以推崇嗟
言達於帝聰迺是允而是從於是命彼倌人駕車言行
束帛加璧適彼丘園覩皇華於原隰問周行於前坳吾

見豹闢洞開推轂遣使天語丁寧誠意懇至豈不欲移
其耕雲釣月之心變其漱石枕流之志將以黼黻吾之
皇猷於以金玉吾之王度毋皎皎白駒兮空谷毋冉冉
青雲兮遠逝幸攬轡以俱來庶吾心之少慰迨夫及門
而迎執綬以升載脂載牽鄰鄰遙征服驂如舞徒御不
驚風褰帷幔日照文茵垂鶴髮兮玉潔振鵠袍子冰清
提干旄子翔翥振和鸞兮鏘鳴疾徐適節啓處惟寧非
若鋒車之促召輜車之駸奔增川原之德色生草木之

精英扶藜竦道傍之觀觀騎竹騰里巷之歡聲孰不以
萬乘之尊能千里求芻蕘之老而一車之聘乃百世爲
巖壑之榮駕言來歸入見歡如陳力行之一語爲治化
之丕基正武皇之心術非儒者之闊迂露盤之慾或因
是而少息方士之惑或因此而見疎視彼枚生浮華之
玄方朔俳優之習實有負金馬待詔之需思昔鄙綿蕞
之兩生采紫芝之四皓胡不屑屑乎高皇之聘乃翩翩
焉遁世而高蹈詎非溺冠之辱拒人於千里之外蒲輪

之禮乃可以屈天下之耆耄武皇求仙故業如煙慨蒲
輪之安在覩青史之煜然於我皇元四海一轍網羅英
豪登崇俊傑聘幣起莘野之耕後車載非熊之獵若龍
興而雲致虎嘯而風烈輔弼遠並于伊周謀謨尚友乎
稷契綽綽乎唐虞三代求賢之禮豈拘拘焉漢室蒲輪
之一節

蒲輪車賦

元
張本

伊古人之造車爰取象於轉蓬何漢家之制度尚蒲輪

以爲隆是蓋武皇之求治用以駕駟而迎申公者乎原
夫漢家之開基也坑灰初冷藜燄未噓馬上乃翁安事
詩書逮世業之四傳爰文運之重舒帝乃開金馬廣石
渠播綸音詔名儒六經表章而出色大雅霧會於西都
惟帝心之未愜尤老成之是思趙綰孔臧乃薦其師年
高德幼兮可以爲邦家之著蔡經明行修兮可以保宗
社之基圖四聰旣達心悅誠孚幸耆碩之快覩請治安
之謀謨殆將以駿馬迎之歟恐驟逸而勞其筋骨也抑

將以屬車而迎之歟恐顛頓而難於升立也爰深思而遠慮莫若安車而駕駟迺命與人構材必堅斲輪必圓法制必精軫輻必全采澤中之蒼蒲輪用裹而循環車以輪而運轉輪以蒲而愈安此蒲輪之車制實所以敬德而尊賢者邪於是遣使節兮皇皇寘彼車於周行束幣帛而加璧光燭朗以景彰詣申公之闕里貢丘園而有光若乃升車而坐按節而行順軌轍之徐徐徹聲韻之鞞鞞穩雙輪之緩駕馭駟馬而不驚是雖殷輅渾堅

曷可喻其樸尚父尊隆何足比其榮吾想夫當此之時
黃髮皤皤巍冠峨峨蒲輪之車不偏不頗前星使以引
導走虎賁而撫呵爾其遵大道路金城俯車軾趨承明
望天顏於咫尺應詔命之丁寧下車布武攝齊而升爍
重瞳之回光唯馨歆之是聆奈何力行之一語竟矛盾
於宸心顧始勤而終怠舍魯邸而無聞豈知爲治之要
道初不在夫多言也哉噫噓噓外仁義兮內多慾侈宮
室兮窮土木求神仙兮蠱方士勒驃騎之幾十萬兮墮

威武昔蒲輪招賢之車兮在何所輪臺下詔兮嗟何補
孰若我皇元之尚賢兮軼唐虞而邁千古下者牧州縣
高者登天府乘駟馬以安行兮食天祿沐恩波於永久
兮又何漢氏之足數也

乘石賦

唐
李昂

觀彼乘石體自孤貞得崑山之片字掩穀城之偉名青
苔備色堅確符情列羣峰而無語縱衆溜而有聲爾其
崔嵬岑絕涵霜貯雪竹徑煙曛松門景滅愜野叟之幽

意抱山人之勁節橫碧岫以霞張噴紅泉而水咽借如
巨形矗業勢若將飛隨匹人之採斲入天子之宮闈故
得削跡青澗端容紫微幸至尊之踐履嘉非陋之因依
於是皇帝穆然乃登珍臺乘玉輅帷弭環其拂汨鱗雜
沓以駢布甸師清畿野廬埽路流星旄以燭日儼雲旌
而彗霧往來斯登升降必步取其磨而不朽貞而無蠹
不然此荒藪之微石何遭逢之多遇請言其本也生必
深山峯壯自閒電熒霞駁樹雜苔斑奇形異質紛拏不

一屹特立以樹空倚崩崖而構室銜箭羽而橫卧聳蓮
峯而半出龍吟應物觸紫巖而吐雲虹梁中斷駕滄海
而觀日故石之爲物也不奢不僭無競無猜偶山水而
長往因和璞而俱來考之雲籍則建名古昔貫億祀而
長存經百王而不易胡施而不可何用而不適願上吾
君千萬年地久天長履茲石

洗乘石賦

以王者順動有
司先成為韻

唐

王起

瑟彼乘石履於聖王每寒水而濯色俾堅容而有常當

宸駕之未嚴貞姿或翳及天步而將踐麗質斯彰於是
五輅載轄六龍齊首森天仗而旣列儼翠華而已久隸
僕乃故實是諮舊章克守取彼流惡滌茲含垢兢兢乎
映金章而鞠躬翼翼兮汲銀瓶而運手發璀璨之色莓
苔染之而不能注清泠之聲埃壒集之而何有皎爾鏡
徹爛然冰鮮承玉趾而增麗拂袞衣而更妍磷磷於清
淺之波自慙奪彩鑿鑿於激揚之水莫敢爭先匪琢匪
磨不涅不磷求韞玉之色彰候和鸞之聲振成吾皇獻

替之義我則如水之投叶吾皇啓沃之心我則如流之順四海是奉百禮所總茲石既潔一人由是而日輝茲石未晞萬騎不戒而雷動君惟度義官則庀司將滌瑕而蕩穢在挹彼而注茲於以昭卜征之候於以明望幸之期潺湲既臨似石磴瀉泉之狀流離欲散有山雲潤礎之姿有翼有嚴既敬既戒去渙浥之色由是砥平吐新鮮之輝用光時邁垂石之洗也列周經垂石之履也合周雅內可以訪道海內外可以觀風天下故曰有扁

斯石見於王者

御定歷代賦彙卷八十九

欽定四庫全書

御定歷代賦彙卷九十

音樂

簫韶九成賦

以曲終九成百獸皆舞爲韻

唐

闕名

聖人順天道防人欲布和以調其性宣樂以察其俗氣
將道志五聲發以成文化盡歡心百獸率而叶曲茫茫
大空樂生其中聲隨化感律與天通交四氣之溥暢貫
三光乎昭融將君子以審樂故先王以省風致同和於

天地諒難究其始終惟樂之廣於何不有包陰陽兮不
集不散降神靈兮或六或九故季札聆音而感深宣尼
忘味於耳盈昭覆情兮煦嫗召游泳以飛鳴演自宵冥
發於性情將不動而爲動自無聲而有聲五者通三我
則貫三才而作陽數有九我則至九變而成不然者何
以調大中何以繼光宅作終樂於數四歷君子之凡百
其聲轉融其道彌赫大哉至樂於以洪覆收之而合乎
希夷張之而散乎宇宙感天神與地祇格靈禽與仁獸

扇風化而以贊則雍熙之可就大韶命曲大章同儕既
和且樂亦孔之皆且簫爲器之所細鳳爲王之所懷若
德遷之音感清淨之化乖則歌已而於狂客孰來儀於
克諧恭惟我君配天作主命工典樂考法師古決聲教
之汪濊合堯禹之規矩士有聞韶嘉於蘊道擊壤希乎
可取同鳥獸之歸仁承德音而率舞

聞韶賦

以宣父在齊三
月忘味爲韻

唐
闕名

韶則盡美聽何可忘況至德之斯過聆奇音之孔揚天

縱多能信以嘉乎擊拊神資博學知具美於典章用而不匱樂亦無荒若充乎四門之術不離乎數仞之牆驗則足微用之可貴聖者妙而合道志者仰而自慰悅五音而肆直孰謂其聳致六府之和平自忘於味省風而八風叶暢觀德而九德昭宣季子慙遊於魯地穆公徒饗於鈞天曷若觀率舞聆薰絃變態無已周流自然可以深骨髓而期富壽豈徒資視聽而娛聖賢至若清磬虛徐朱絃疏越鼓鼓以之迭奏笙鏞於焉間發以感陰

陽於宇宙耀光明於日月自表虞德之不衰豈效文王之既沒是知武也未善護也有慙鈞化歸於二八讓德明乎再三所以其道不窮厥監斯在驗率舞於百獸想同和於四海如其樂正非關自衛而來儻俟風移有異從周而改惜惜不極杳杳乍迷俄將復矣抑又揚兮夢周公而不見想聖德而思齊聞斯行諸厥不踰矩感心駭目是何其覩悠然而往三歎如在夫寥天滌爾而旋萬籟已吟於九土詎忘味於三月諒永懷於千古幸賦

韶樂之遺音美哉尼父

雲韶樂賦

唐
卽軫

帝唐之於宣昭立極本乎神堯彌六葉以開泰接三正
而會朝樂一人之淳德成萬國之謳謠故太宗載橐而
象舞聞於破陣我后垂拱而作樂嗣曰雲韶夫道者率
性作者謂聖統同積和倫理知政斯古之所以歌九德
誦六詩咸池備矣大章繼之玉戚朱干降及禮文之代
簫攄箏箏行乎樸畧之時若乃周道衰王澤竭正始之

音奔散哀思之風鬱結逾千載而未返以俟我開元之
濬哲噫我樂之方作也天保定武功成紹堯光澤嗣武
重明感物以風下理心而和聲稽六律之宮變諧八音
而磬清越二十四祀建寅望之夕啓千門以達陽氣御
重城而臨百辟張彩燈之煌煌啟新樓之奕奕甸師庭
燎武賁陞戟命典庸使設翼簏飾羽旄而展金石納四
夷之僭佻兜離奏六代之翕純繳繹乃翼日出雲韶而
舞之徒觀其降輦路臨廣場曳羅裙之嫋嫋鳴玉佩之

鏘鏘始逶迤而並進終宛轉而成行於是合以絃匏從之磬管昭敬意於廉直本善心之嘽緩克和四夷應春候而角調取象八風如舞行之綴短霓裳綵鬪雲髻花垂清歌互舉玉步徐移俯仰有節周旋中規將導志以變轉幾成文於合離爾其美目流盼輕姿聳峙或少進而赴商俄善來而應徵貫魚初度驚鴻乍起容裔自得蹁躑未已裝衣屢更新態不窮忽舉袖而縈紫復迴身而拖紅及夫繁音九變曲度將終神人以和天地攸同

立五常之行移四海之風然後樂師告罷退之惟宮時
也聖歡浹睿澤深一人有慶萬國歡心羣臣獻華封之
祝天子御薰絃之琴照寰光於合璧式王度其如金乾
道兮下濟湛恩兮汪濊四三皇兮六五帝于胥樂兮千
萬歲

樂九成賦

唐
李 權

唐在六葉將修封禪想與靈接乃冠顙色佩朝陽瑱瑤
碧之明潤屑桂椒之芳香曰予意夫放勳光明重華風

聲髣髴兮陽靈之宇嬋娟兮介丘之平先太樂緝正聲
更協五變親和九成均鳴絲於金竹參雲門與咸英使
子野奪意伶倫喪精帝於是擢翠竿於東國翳華芝而
遂行然猶左却宓妃右屏西子寵罷金屋歡辭瑤水豈
修蛾之敢迴匪清臚之能視飛燕心折毛嬙色沮朝雲
之姣兮不能呈其妍絕代之冶兮無所施其美况肯選
無限情未央將與昭陽比盛傾宮相望仍復斥鄭衛捐
倡優靡曼無取淫哇不留淮南兮激楚荆歌兮趙舞長

袖更進新聲自許嬌彩雲之徘徊拂錦茵而容與能使
秦帝熒惑漢皇延佇度曲東城橫態北渚莫不卷襞而
索無處所庾射兕之騁驚役誇胡之豫遊去翠被與豹
舄戢鳥唬及騂騶復想像雲夢彷徨青丘麋麇熊羆之
藪灌莽陵岡之幽於中爲樂驕矜未休荒淫震蕩其誠
不修將穆然儲思粹清高想意拔招搖兮往若而至乃
建玉旃之光耀動金根之逶迤丹蚪翊輦白武衛旌後
舞玄鵠前鳴長離清壇下蔚高煙上馳故能決地闢開

天維降青玄兮來斯登黃靈兮遲遲江畔之茅抽三脊
北里之禾滿芳席睢上之黃龍兮瑞以多願持朱鴈兮
薦天歌明德既享靈心每和宜其日炷中降雲煙上帝
光五色聲萬歲氣非煙風若蕙敷倬成山碣石澤比漲
海洪波茲所以庶高宗之美豈七十二君之足多孰與
雄奢驕貴逞慾矜意貪靈好奇恃力誇資惑方士之設
邀羨門之期果爲風雨所中神仙見期歷琅邪兮徒遠
望蓬萊兮幾時者哉

大韶賦

有序

明
貝瓊

傳曰堯作大章舜作大韶韶繼也言舜能繼紹堯之德也周禮曰大韶禹樂名也言禹能大堯舜之德也前乎舜者堯非不繼譽也後乎堯者禹非不繼舜也特於舜言繼者法成乎堯也在譽之時法猶未成堯雖繼之而可繼之事未備舜協於帝在舜之時功爲已協禹雖繼之不足爲難矣則可繼之善善繼之功唯舜獨也是韶爲舜之樂無疑季札觀樂見舞箭韶者曰德至矣盛矣

如天之無不覆幬如地之無不持載雖甚盛德蔑以加
矣後孔子學之於齊三月不知肉味曰不圖爲樂之至
於斯也蓋知樂之盡善盡美莫過於韶宜當時之感召
丹朱在位羣后德讓祖考來格鳥獸跄跄鳳凰來儀也
然非舜之德致和於上夔之樂召和於下何以臻此哉
故述而爲賦不徒極其聲音之美而且本之舜之德云
賦曰

有東吳公子北走齊魯之疆觀於嶧山而見孔林之主

人焉主人曰公子之遊也亦將有所睹乎曰無也生於震澤三泖之上僻陋寡聞竊慕禮樂之事而六律七均之制嘗究心久矣願有請於大人先生焉主人曰嘻吳會東南之天府而天下之善音萃焉然公子猶有所未足者豈將厭澹泊而悅鏗鏘乎必將挾陳娥攜趙女摩鷗絃考鼉鼓若是以爲樂乎公子憊然不悅曰霓裳之曲唐之所以播越也廣陵之散晉之所以分裂也固不足言矣若此者又戎狄之樂無異紂之靡靡以亡其國

者豈君子之所樂乎願聞其他主人曰七德之歌七德之舞太宗之肇王業也亦嘗聞之乎曰伯者之事子孫無所法焉曰漢祖蹴羸龍飛沛中置酒層臺悲歌大風造基四百光啓西東若是何如公子曰猶有伯心之存也駁而未純然亦一世之雄乎請言其上主人曰抑聞武之六成乎武之濟河而西也馬散弗乘牛散弗服倒載干戈包以虎皮天下知其寢兵不用也爰作武以象功焉鼓以戒衆久然後戰也長歌連延起其慕也發揚

蹈厲時不可失也故一成北出再成滅商三成自北而南四成南國是疆五成分左右以居周召六成復始而爲天下王振鐸夾舞秉戈鷹揚若是何如公子曰其容美矣此武事也未盡善也請言其上主人曰其惟舜之大韶乎當夫六府治三事和敘九功形九歌嶧陽之桐可以琢琴瑟焉雲夢之篠可以竅管籥焉泗濱之石可以磬而爲磬焉荆山之金可以範而爲鏞焉八音既具而大體短脰之屬有力而不能走者以之爲鐘簴焉小

體騫腹聲清而遠聞者以之爲磬簏焉其作也控以合
之其終也揭以止之洪者鏗而克清者磬而介淒切而
不流泛濫而可會當夫朝廷之燕享宗廟之祭祀於是
而奏焉升歌在上匏竹在下代作間奏秩秩有序或擊
或戛或拊或搏清亮而高遠象乎天之渾淪廣厚而含
容象乎地之磅礴一變一通分四時之終始一散一潤
兮風雨之回合是時也熙熙然八荒一春皞皞乎洪荒
大樸格三苗於洞庭丹朱賓而有恪俯而聆之純如辛

甘之相濟皦如有倫而莫攸詘如斷玉之復續繹如驪
珠之碎落飛流合而萬壑雷轉清風生而天籟交作吟
九淵之老龍喚九臯之玄鶴旣要妙而悠揚亦和平而
澹泊無急微噍殺以感其憂無嘽諧慢易以感其樂其
動於物也客何爲而肅若神何爲而來思獸何爲而舞
於土階鳳何爲而翔於茅茨明協乎大章博擬乎咸池
所以保無窮之治以示安而不忘乎危也悼六龍之南
巡歷蒼梧而上九疑阿母之玉琯猶在湘靈之錦瑟空

悲悵遺音之寂寂叫有虞兮遠而然而齊之有韶陳亡而流於茲也海外之有韶聖人之化播於蠻夷也宜季札觀之而知德仲尼學之而忘味彼武之六極於陰特著其武功此韶之九極於陽寔昭其文治也公子以爲何如公子迺避席而謝曰至矣盡矣不可以有加矣主人曰未也請授以九德之歌其一洪流橫曰玄黃判風氣開洪流橫民乃災五行汨帝爲哀禹治之啓始孩決九川平九垓百穀生田每每其二洪流殺曰洪流殺兮

民災既除山有鳥獸兮川有魚爰可食兮可居胥樂且
歌兮毋忘厥初其三三苗格曰惟聖亶聰撫有九圍蠢
蠢三苗險阻是依出師於南奮我帝威我師既還苗亦
來歸其四四凶黜曰德與刑兮國之經四凶斥兮八元
在庭帝無爲四海寧其五正德之歌曰惟天降命物必
有則民之瞽瞍胡乃自賊五教不行禽獸踈邈聖人龍
飛四方之極其六利用之歌曰水既平兮別九州下爲
隰兮高爲丘徒則軒兮涉則舟以羨濟之兮百貨流財

孔阜兮樂且無憂其七厚生之歌曰下民孔艱兮遭墊
溺寒我衣兮饑我食我無民違兮父母職其八鳳凰來
儀曰堯不惜兮舜不辭授以天下萬物治寒暑無易風
雨時簫韶九奏朱鳳儀其九萬世賴曰天覆地載高廣
莫測孰參贊是俾衣而食帝治天下如埏如埴萬世賴
之安知其力公子曰嗚呼禮廢樂崩幾千秋矣而始聞
主人之宏論乃復爲之歌曰雅南已亡兮流蕩曷正感
栗雷怒兮空桑無聲綠綺不陳兮薦檀槽與秦箏妖倡

爲妍兮嘯鸞鵠而啼燕鶯孰究夫大韶之盡善盡美兮
寔婉夫六英六莖後千載之聖人兮集厥大成安得聞
九奏於清都兮御天風而上征

鈞天樂賦

以上天無聲昭
錫有道爲韻

唐 裴 度

嘉大樂之同和惟上帝之申錫豈功成之可致必神遇
而來覲吉夢足徵奇音無數爰昇天表備聽乎曠如繹
如方悟人間徒聞乎擊石拊石想夫秦穆趙簡遊寬太
清下連霄而無覺上和奏而有聲感之深殊九變之曲

神而化異三代之名則知昭假於下潛通在上俾晝作
夜既尚寐而冥濛好樂無荒乃克諧而瀏亮翕然並作
隱爾盡暢所以娛其精誠所以滌夫昏妄既而受天錫
降天衢空忽恍於沖漠猶髣髴於虛無餘響悒悒而在
聽撫躬眇眇而異途原夫育萬靈騰九有縱未央之娛
樂表不息之悠久永爲二主觀樂鈞天假夢中之高會
豈邦內之驩然未若我皇沖一氣而獨運協六律而相
宣發善令爲鐘鼓播仁聲於管絃將興慶於乾坤之內

非取樂於耳目之前不識不知順天之道旁流喜氣寧
候於鏗鏘盡得歡心詎資於擊考斯乃常聞於率土不
闕於重霄致中和而廣被誠教化之孔昭是曰鈞天之
樂也又何萬舞之與九韶

鈞天樂賦

以上天無聲昭
錫有道為韻

唐
闕名

何上天之默默有鈞天之可名蓋德至而則至從無聲
而有聲和樂發音與夢寐而潛契精誠自感何耳目之
能營懿乎玄德升聞天降靈貺匪同乎搏拊之和豈在

乎雲霄之上感夫心志達乎肌膚都萬物而有喜聞九
奏而可娛其靜也寂寂其動也于于異霜天之鐘應同
漢日之山呼舂蠶兮乍有杳冥兮若無表穆公之休烈
爲簡子之祥符以遨以遊實我心之獨得不考不擊豈
他人之是愉惟茲至樂信夫玄造非天私於二君惟天
饗於有道不然何融融洩洩發於自然萬籟不雜八音
相宣且降歡以入夢知惟德之動天實深乎骨髓之內
豈專於視聽之前惟寤語之有說何言辭之能全至哉

無金石之迭代無宮商之先後忽變化於合漠韻鏗鏘
於妙有既登不死之福庭自諧保生之仁壽則知夫天
可通兮道可守自感應之無差知影響之不苟降鑒匪
遙德音孔昭鄙未善之周武甚盡美之虞韶豈獨聆之
兮四肢酣暢感之兮心神洗滌將使道德之不昧必受
如斯之殊錫者也

鈞天樂賦

以上天無聲昭
錫有道焉韻

唐
李觀

異哉天地之樂其可聞乎美矣盛矣神夫至夫謂其有

不見其有謂其無不見其無是惟德盛者能感匪詞工
者足愉故昔秦穆之寐也去乎人間即乎天上豁如有
遇杳若無妄大音嘈兮交作上帝儼以延望百神紛紜
而齊赴萬變合沓而殊狀日月正其東西星辰分其背
向乃有地祇上謁天仙下朝奕奕翩翩霓裳羽蓋之游
集砰砰磴磴撞鐘擊鼓之相器舞之者傚傚而中節歌
之者洩洩而匪驕其疾武足畏其徐文足昭遇之以神
殊季札之觀魯樂而忘味類宣尼之聽韶是知窮深極

厚於何不有罕究其真莫尋其首德聲及於無外協氣
積於虛受駭矣乎樂以和和之至而天用作天之神而
樂克宣其動也與元氣迭運其靜也與大虛相全噫乎
哉不可階升者天道但見夫乘虛躡浩乍如周文之夢
實異季路之禱獲覩天樂之和羅神工之擊考是天之
所合道不虛行九奏未終初疑八佾三歎既退方異六
英徒觀夫鏜鏘之內響優柔之正聲六幽爲之震龜七
曜爲之重晶而莫識其曲達其情既覺既悟如喜如戚

天樂之遺音在耳天神之仿佛猶覲顧何德而承之受祉於天錫

大合樂賦

以王者之政備於樂聲爲韻

唐

闕名

樂者制也所以道天和全人性故作之以崇德審之以知政王者敬其事而闡其道順其時而行其令逮夫季春屆期乃命有司且曰羣萌達矣播樂安之重以國經不可闕躬理必以時將齊度於節奏被選樂於聲詩撰乃吉日總於樂師是用資於誨爾亦無忝於命夔由是

司儀辨等庶工守位備絃管之聲陳匏竹之器祝故邇
迤而就列簋簠嶙峋而居次克展禮容而告樂備天子
於是率九卿暨三事必虔心而有待俾陪扈而斯致既
親覲於宮懸又何假以庭試若乃曲度是并不可殫名
雜以韶濩間以英莖追宣尼之前聞是能忘味念師乙
之舊說各辨遺聲考彼廢興存乎清濁安以樂且知治
世之音哀以思不雜異方之樂類飛聲於垂仁等潤物
於流渥足使魏文侯之卧聽已悟前非吳季子之備觀

難施先覺既盡美矣又何加乎諒從律而罔惑將克諧而不渝必在聽和知其樂也洩洩是惟反樸變其風也于于具舉不患乎聲希統同寧貴於和寡奚必饗鈞天之靈貺而有殊焉想洞庭之異音更思古者誠夫天祚我皇恩歷遐昌掩遽古之嘉樂軼三代之聖王竊賀聲明之巨麗敢聯雅頌之遺章

大合樂賦

以天地之禮張樂雍美爲韻

宋

王禹偁

王者作樂崇德因高事天固大合之奏也揚至音於自

然本乎人心風俗以之而變矣考諸古道神祇於是而
降焉豈不以大樂之制聖人能事於以導淳和之氣於
以室嗜慾之志必使律呂克諧宮商有次絕靡靡之邪
聲表悃悃於大義以此感人而人悅以此薦神而神至
其用也非八蜡以六宗其大也必父天而母地見德音
之孔昭信同和而有自又何止百獸率舞丹鳳來儀亦
將動孝思於嚴配揚和樂於華夷皞如繹如所謂樂之
大者載考載拊乃得神其聽之徒觀夫其儀濟濟大合

之樂兮發而中禮於以用之兮配至神於祖禰其聲洋洋大合之樂兮發而有章於以用之兮表至德於皇王寧但崇牙設猛簾張金石間作干戚成行然後稱爲雅樂哉議夫樂之設也非管非籥樂之用也惟淳惟樸若非審音以知政安能制禮而作樂聽之忘味佞邪之道弗興和而不淫廉正之風有覺是以大合之樂其樂雍雍用之於園丘方澤施之於除禪登封豈鐘鼓云乎姑悅人之耳目異鏗鏘而已失盛德之形容我國家韶護

登歌咸英盡美復夔樂於雅正黜鄭聲於遠遷自然天地效靈耿休光於大祀

大成樂賦

元 高明

尼山降神麟紱告祥表盛德於萬世垂休聲於百王
丹書之已遠懷素王而不忘宜大成之嘉樂昭德音之
洋洋夫其金罇初宣球磬終鳴合琴匏之雅韻畜墳簞
之和聲後合樂以齊奏先工歌之間升爍始終之條理
非一音之小成象盛德之咸備豈一善之能名至若穆

穆廟堂几筵旣陳豆籩靜嘉粢盛苾芬燎晰晰以在庭
夜迢迢以向晨聆控楬之迭奏喜絲簧之遞聞是乃秩
秩其倫喤喤其音鏗乎若衛之磬泠然若杏壇之琴若
曾點之瑟悠然而間歇類闕睢之亂淵乎其幽深感餘
韻之未終懷洙泗而沉吟嗟夫雲門不歌咸池已息况
女樂之歸已納而雍撤之僭未革雖雅頌之得所歎陽
襄之屏跡遂乃斥鄭聲以嚴法託虞韶以垂則歎夫人
莫我知匪顏氏其孰能識故皦如繹如之訓僅語之太

師而金石絲竹之音徒聞於舊宅嗟聖人之道不獲見
於制作而聞其樂者猶足以想像其大成之德彼夷惠
與伊尹雖制行之造極猶一音之特奏固與大成者殊
途而異域也猗歟盛哉時文教弘施繁爾多士際茲休
期瞻孔廟之翼翼本治化之熙熙聆斯音者必知金聲
玉振之序得於心者必爲始終條理之思豈徒習其音
節若矇瞍之所爲者哉歌曰於穆兮辟雍肅清祀兮吾
將從攬蘋藻兮薦芳撫琴瑟兮鼓鐘樂奏兮備舉工歌

兮容與嗶嗶兮厥聲神續紛兮來下尼山兮崇崇石巖
巖兮雲溶溶樂之成兮猶有終倚君子兮思無窮

大成樂賦

元陶安

片波環璧芝楹毓金素王疑旒有赫其臨肅成均之藏
祀冠天下之儒林運隆文明之世樂鳴正人之音鏗宮
商於翕繹調律呂於精深此釋奠大成之樂所以象聖
德而感人心也若乃宿懸展聲篳篥立八音繁會莫
重金石範荆揚之貴品礪泗濱之瑩質貫脈絡於宣收

妙始振而終詘爰有琴瑟布絲簫篪按竹笙以匏列壎
惟土屬鼗鼓奏革祝敔諧木序有堂上堂下之分歌有
凝安同安之曲搏拊戛擊審輕重而中倫要眇舒遲益
悠揚而不促迭唱和以永言盛物采以充目譜雅頌之
遺芳洗淫哇之鄙俗於時殿陞清穆牲齋馨香盥薦是
嚴升降有章明靈在天來格來享被龍章其負宸嘉盈
耳而洋洋使夫聆之者陶一身之天和觀之者詠千古
之道域融暢精神流通血脈信乎儷美於虞廷之韶聯

輝於清廟之瑟矣予獨因而有感焉當夫尼山降神洙泗闡經屹屹乎生知安行之資皇皇乎出類拔萃之英巍巍乎聖賢之標準顯顯乎帝王之儀刑祖述憲章而功著仕止久速而時行彼莘摯之自任暨惠和而夷清地雖躋乎至極僅一德之宜榮孰愈聖智之全美巧力之優并與其爲小成獨奏之一樂曷若爲八音並奏之大成是以始終條理之取喻形於孟氏極贊而深明洪惟皇朝教溢八紘鼓至和於兩間決仁澤於羣生一夔

制作乎大章百獸率舞乎明廷聞管籥而同樂欣欣然
有喜色舞干羽而格遠蕩蕩乎無能名崇儒重道祖述
不承允稱加封之詔式符雅樂之稱聖主龍飛經筵盛
典中和建極海宇謚寧兼總條貫玉振金聲方將考大
合於周禮而益隆大成樂於孔庭宜乎開億萬年之太
平也

賀制大成樂賦

有序

明
朱升

歲丙午夏四月我殿下肇基帝業首興文治於武功之

時立學校求遺書追德報功必先制吾夫子之廟樂而
名曰大成則皇圖鞏固安如泰山臣朱升謹賦以對揚
休命於萬年無疆云爾賦曰

繫聞樂而知德兮可以等乎前王領大成之鴻奏兮仰
聖德之無疆道秘洩於馬圖兮人文闡乎羲皇法載始
而備具兮煥伊耆之文章周文武之繼聖兮監制作於
夏商遇貞元之會合兮極治教之休明我宣尼之挺生
兮當周德之方涼法文武之無常師兮復遠宗乎虞唐

酌四代之禮樂兮寔萬世之通行仕止久速之時中兮
豈清任和之偏長孟氏長於譬喻兮曰集大成以讚揚
今爲廟樂之嘉名兮果聲振之洋洋若乃初日發光和
風迴舉戟門既啓禮官以聚列宮懸之簾植崇牙之羽
瞻冕旒之在上肅冠裳之配主於是發人聲揚樂語亶
輕清之不滓粵悠揚之如縷想夫主之以黃鍾越之以
南呂瑟琴作於堂笙鏞間於下振舞儀於肅翼出洪聲
於鍾簋鼗鼓播擊而相諧塤箎唱和而得所彼之獨奏

一音自爲始終此之大成衆樂總其端緒無亦金之宣而玉之收奚啻合以祝而止以故所以聞其樂而知其德蓋有賢於堯舜而不愧於韶舞者也聖君撫運其命維新拯救黎庶文武聖神東征而西夷怨南伐而北狄嗔羣醜遠遁簪纓來賓干戈未戢聖教攸欽舉大成以崇嘉號致祠祭而出絲綸舉茲盛典感格人神自茲而往復神州於腥穢闢乾坤於再造極天所覆環四海而貢賦稅聖子神孫億萬年而民猶親於是名稱足以表

寔於萬古豈但樂舞所以配德於斯人夫是以天地位
萬物育聖神治教凡有心知嗜欲者莫不尊親今聖前
聖此心同而此理均也故曰聖人會人物於一身萬象
異形而同體通古今於一息百王異世而同神臣朱升
幸際五百昌期而修大成之綸音聞大成之廟樂安得
洗耳於九德之歌拭目於九韶之舞而接九成於紫宸
洞庭張樂賦

以八音克諧天
地充滿爲韻

唐
闕名

洋洋乎軒轅之作也陶玄化於發生運神武之不殺張

至樂之純備播皇風之塊圮舉端於素得太始之自然
克成於和蕩生靈之天札何必管聲爲五羽數惟八然
後合夫大夏請言斯樂也不振而其聽博不眩而其意
深大而不撻樂而不淫將使儉者得中和之紀奢者已
醉飽之心君子曰是樂也不朽之德音於是一債一起
於彼南國真聲暢和氣塞其靜也洞庭安波其清也楚
山霽色百蠻以之神化六狄由斯仰德是樂也乃不朽
之德音於是柔克可以上享天心可以蕃屏人則知武

也美而未盡獲矣猶有慙德觀其妙矣則天地盛而氣
不乖陰陽感而六律諧惟精惟一唯萬舞之奕奕無荒
無怠見鐘鼓之喑喑觀其皦矣則合於自然施之無邊
輝綽發越行流散遷事高太古功儷鈞天其曲直其音
至飾諸喜以平諸心極乎天而蟠乎地率其樂也何享
而不利原夫樂之契道也在心而心正在聽而聽聰故
至人定和而守一合愛而流通必以濟刑政之理行山
川之風豈徒耳目是翫情性克充而已哉當是時也太

虛過雲寒谷生煖三光昭晰八極充滿何淳風之泱泱
諒千古之纂纂吹伶倫之律惜彼時移繼炎氏之頌愧
茲才短

洞庭張樂賦

以八音克諧天
地充滿爲韻

唐

蔣至

聆黃帝之遺音澹乎至察天非私覆稱其德以無三國
有玄風應其方以宣八所以合德樞之幽鍵率至人之
大夏當其存乎象用酌彼鈞深將合之於萬籟故稽之
於八音非剽之以耳寧聽之以心風師拊石雲將攢金

棄園客之絲彈爲鶴舞辭羌人之竹擲以龍吟雖不擊
而不考或習習而惜惜坐忘斯得旋歸靜然其始也懼
其終也惑迴日月之運行會鬼神之柔克淒清廣莫之
野蔓衍華胥之國奔夷貊於蟠木之東聳鱗翰於幽陵
之北和容遠被休氣充塞邦用榮懷人之克諧何以鼓
靈鼓之坎坎撞猛簏之喈喈至乃起於無朕調之自然
張洞庭兮聽咸池同嶰谷兮合鈞天昭炎氏之作頌寓
莊生之外篇是則成象者樂之餘希聲者樂之器舞妙

有爲八佾懸至和爲二肆觀其妙叩以玄闕動無方覃
於厚地貫陰陽而不測庸詎識其純粹吾君纘戎始酌
遺風集端虛於黃屋攘靡曼於玄宮理代之音兮蹈而
不厲不言而化兮美以能充今以視昔寔由玄同受靈
命之誕敷宥希夷之自滿考徵音於天樂謝能賦於窺
管

洞庭張樂賦

以八音克諧天
地充滿爲韻

唐

闕名

昔軒帝出震用率大夏三才以貞萬人以察獸蚩尤於

涿鹿之墟登飛龍九五張咸池於洞庭之野舞玄鶴二
八遂使素女絃瑟昭文綴琴璫箎協韻笙磬同音始鏗
鏘以拊石終訇隱而擬金雷出地中以成奮豫之象風
行水上油生子諒之心包混茫之廣大含元氣之高深
不知不識順帝之則無視無聽至道之極三月忘味思
在齊而攸聞七旬格苗非得雋而爲克所以事與時並
名與功偕羣方旣睦庶尹允諧且如碩人褰然萬舞在
前秉翟奕奕象九奏於鈞天后夔爰至三步旣次夾振

蹢蹢率百獸於厚地諒人神之在和何匏竹之足備況
乎皇上降衷以符德充理七音於周雅歌五絃於舜風
仁親是務車軌攸同信敷草木澤被昆蟲在坑谷而何
有與幃載而齊功故得萬屬宅心四夷修款音無遠邐
義取觀盥聞政始之頌聲足誠傾以持滿空歌時以獻
賦若窺天之以管

君臣相遇樂賦

以聖作物觀聞韶
忘味爲韻有序

唐

潘炎

繼天者君也戴天者臣也下之事上作股肱耳目上之
任下敷心腹腎腸甚矣哉君之難臣之不易也今聖上
高九皇之道賢臣合一德之義風雲玄感魚水冥符作
樂崇德於是乎在詩有六義請賦歌之曰

於赫我皇受天明命平六府和八政天合德日躋聖神
生甫而山出雲在玉衡而照金鏡考金石以和樂美鹽
梅之克正超百王之至理冠六代之尤盛至矣哉鴻鈞
之代何物不樂仰乾坤之德知樂之所由興觀君臣之

和知樂之所由作在宇宙而皆滿鼓陰陽而合漠且宮
爲君商爲臣其德斯溥羽爲物徵爲事其宜咸若諧宰
相之變理象天子之經畧可以頌猗那可以美於鑠正
南面陳黼黻於以紀聲明於以展文物進旅退旅撞鐘
考鼓四方皆聞萬物咸覩事無事明主之衣已垂爲無
爲大臣之袞何補雲干呂而風入律進成規兮退成矩
無不憐也象乎三天無不載也均乎九土小仲尼之在
齊狹季札之觀魯惟太平之和樂按前史之未聞不殊

東戶之代何謝南風之薰遠無攜而邇不逼夔爲臣而
堯爲君肅雍和鳴越詩人之作發揚蹈厲薄武王之勳
節有序聲成文豈徒以諧鼓舞蓋所以調氤氲允所謂
奏大音兮當聖朝合六英兮和九韶陳威儀之穆穆表
至德之昭昭奏之以人奚異洞庭之響莫匪爾極何必
康衢之謠一屈一伸下兢上讓或右文而左武或先吁
而後唱端拱者上帝之君賡歌者濟時之相天化優洽
淳風溥暢元元本本形難爲狀嶠州之北邈矣可遊汾

水之陽杳然自喪所以表大道之理豈徒知皇帝之貴
徐則文足昭疾則武足畏俯仰之際見疏展之情綴兆
之間知鼎鼎之味不聞於柏皇栗陸何有於殷周漢魏
敢獻幽蘭之曲希從拔茅之彙

獻凱樂賦

以獻茲大功德
樂於祖爲韻

唐

高郢

愷樂象功曲成斯獻旣宣威而是奏亦飾喜而攸建播
師律於六律震海用寧揚軍聲於五聲華夷知勸原夫
飲至云畢告捷在茲陳筭篋之列歌杖杜之詩天地同

和盡樂止戈之武生靈咸若俱歡反旆之師觀其鐘鼓
克諧羽旄繁會伊德音所發寔神功是賴靡而厲彰乎
樂在其中感而通俾夫聲聞於外回八風以柔服叶七
德而保大鏗鏘旣薦乎成文條暢有符於交泰若乃昭
聲教定武功肅軍容於清廟和樂節於皇風奏在偃旗
之時寧惟三捷獻於歸馬之日何愧一戎於是洪稜奮
盛禮陳感怒聲而色作駭壯觀而氣振且流歡於遠邇
乃昭慶於神人輝德是資克戒熊羆之士審音斯取不

忘將帥之臣則知伐叛既在乎師獻功必資於樂綴兆
若習於部伍進退如分其犄角矧乎旣旣之功斯立鏘
鏘之韻相符始理心而啓聖終盈耳以爲娛彼周伐玁
狁漢征單于皆窮欲而黷武故人殘而力無未若我配
盛德永維圖將使自東自西聆至音而斯爲盛矣盡善
盡美欣玄德而不亦樂乎旣而一人有作萬物皆覩掩
軒后之咸池陋周王之大武播丕績於宮徵獻盛樂於
宗祖客有擊拊而歌聖功願比身於率舞

功成作樂賦

唐
李子卿

夫九功不成八音不會所以功成作樂乃知樂之爲大
上帝以亭育道周故鈞天慤慤軒轅以創業功成故雲
門砰礚不才狂智之士敢議聖唐之樂我高祖神堯皇
帝歷數在躬鈞樞初握撥亂反正戮諸夏之鯨鯢枯楊
生菱埽中原之霜電太宗以電擊肅慎洗白刃於遼水
高宗以風行營丘颺青煙於太岳二宗一祖功高道邈
我開元神武皇帝夷內難纂前緒皇綱弛而更張帝典

墜而還舉從萬人之後欲安一物之失所頃年祀后土
夜吐神光中歲燎皇天晝聞山語曠繇古而未覲非軒
頊而誰與宜樂功成當崇簋簠貞觀草創已模五莖六
英開元增修更叶黃鍾大呂命夔典事大制宮懸鳴絲
則文動奏金則武宣羽旄含其春露干戚耀其秋天慶
雲既同於舜日大風無異於漢年於是八音具舉六樂
斯備工無奪倫守不假器伏羲之瑟琴有序女媧之笙
簧畢萃乘逸韻於伯牙得遺音於師摯窮搏拊之深術

盡戛擊之幽致動角則寒谷花明叩商則春林葉墜聲
無誤曲周郎之顧何施調有雅音季子之聽應異初舞
而魚躍龍騰終曲而鶴翔鳳至誠可以克諧神人交暢
天地者矣且述者彰於有聖作者表於有功徵乎正始
繫彼國風聲邪則道澆俗獎調雅則人和年豐當今八
風通六律同其音正其氣雄文昭德而那對武盡美而
未工聆響皆清比無聲而無臭聞風自悅何自西而自
東誠宜播在金石永永無窮有麗簪垂白之老擊壤而

歌曰功成作樂兮帝力則那樂正崇德兮雅頌則多雲
門之典兮大呂之歌金石節奏兮絲竹駢羅天地已正
兮神人以和兩階舞羽兮三邊止戈擊壤鼓腹兮不識
其他客有獻成功之頌九重深兮其若何

作樂崇德賦

以王者順動殷
薦趨時爲韻

唐

闕名

我皇以合天爲德神化爲勲鄙銘功於彝器思播德於
樂文由是播大章大夏表克長克君美韶者舜慙獲惟
殷未足方其至美而且讓其樂云於是俗泰時康近服

遠信聲諧六律事從百順樂府爰闢宮懸始震樹干羽
而駢羅列鏞鼓而克初八佾之疾徐無失九成之洪殺
克慎憇懣不生子諒咸進洋洋玄化流於莞磬之中決
決大風發於絲竹之韻觀夫崇德之祭也郊上帝祀方
祗配祖列位崇壇奉犧六代明備千官肅祗殷薦咸若
嘉肴孔時聲音上聞同韶之盡美戢穀下降知神之格
思於時曙色初分祥風微扇肅肅嚴配陰陰嘉薦聲明
動於皇天文物驚於赤縣至矣哉德不崇無以表金石

之娛樂不作無以表天地之符樂作而萬芳草偃德表而八裔風趨昔先代之薦也或中和罔紀鏗鏘罔假徒載考而載擊非大者而遠者孰若奮至聖之光薦明德之香陋咸池於堯帝笑舞象於周王秦穆之鈞天遠設軒皇之廣樂空張聖上猶兢自持非禮勿動鄭衛斯斥溺音是恐客有聞至德之音知我皇之所以垂拱

延和殿奏新樂賦

宋
蘇軾

皇帝踐阼之三載也治道旁達王功告成御延和之高

拱奏元祐之新聲翕然便坐之前初觀擊拊允也德音
之作皆效和平自昔鍾律不調工師失職鄭衛之聲既
盛雅頌之音殆息時有作者僅存遺則於魏則大樂令
夔在漢則河間王德俾後世之有考賴斯人之用力時
移事改嗟制作之各殊昔是今非知高下之孰得爰有
耆德適丁盛時以謂樂之作也臣嘗學之顧近世之所
用校古人而失宜峴下撲律猶有太高之弊爰改照尺
不知同失於斯是用稽周官之舊法而均其分寸驗太

府之見尺而審其毫釐鑄器而成庶幾改數以正度具
書以獻孰謂體知而無師時惟帝俞眷茲元老雖退身
而安逸未忘心於論討鏗然鐘磬之調適燦然簏業之
華好聊即便安之所奏黃鍾而歌大成行詠文明之章
薦英祖而享神考爾乃停法部之役而衆工莫與肆太
常之業而邇臣必陪天聽聰明而下就時風和協以徐
回歌曲既登將歎貫珠之美韶音可合庶幾儀鳳之來
斯蓋世格文明俗躋仁壽天地之和既應金石之樂可

奏延英旁矚念故老之不來講武前臨誚羣慝之交構
然則律制既立治功日新號令皆發而中節磬筦無聞
於奪倫上以導和氣於宮掖下以胥悅豫於臣鄰以清
濁任意而相譏何憂工玉謂宮商各諧而自遂無愧音
臣嗚呼趙鐸固中於宮商周尺仍分於清濁道欲詳解
事資學博儻非夔曠之徒孰能正一代之樂

九夏賦

有序

元
汪克寬

周官鐘師掌金奏凡樂事以鐘鼓奏九夏王夏肆夏昭

夏納夏章夏齊夏族夏祴夏驚夏註曰金奏擊金以爲
奏樂之節金謂鐘及鐃先擊鐘次擊鼓以奏九夏夏大
也樂之大歌有九杜子春云祴謂爲陔王出入奏王夏
尸出入奏肆夏牲出入奏昭夏四方賓來奏納夏臣有
功奏章夏夫人祭奏齊夏族人侍奏族夏賓醉而出奏
陔夏公出入奏驚夏禮外傳曰朝聘燕享之禮或受之
於廟或延之於寢及祭祀在廟皆以樂納賓夫人助祭
出入奏齊夏周公制禮而樂章大者有九謂之九夏笙

師掌春牘應雅以教祓樂註曰以此三器築地爲之行
節按鄭康成曰肆夏詩也叔孫穆子與文王鹿鳴俱稱
三夏則九夏皆詩篇名頌之族類也左傳杜預註曰肆
夏樂曲名周禮九夏其二肆夏一名繁其三昭夏一名
遏其四納夏一名渠蓋擊鐘而奏此三夏也魯語又曰
肆夏繁遏渠呂叔玉曰肆夏繁遏渠皆周頌也肆夏時
邁也繁遏執競也渠思文也其說互異要之九夏皆樂
歌之名而不可考矣疏曰王出入令奏王夏尸出入令

奏肆夏牲出入令奏昭夏皆大司樂文四方賓來奏納
夏臣有功奏章夏夫人祭奏齊夏族人侍奏族夏四者
無明文或子春別有所見云賓醉而出奏陔夏者賓醉
將出恐其失禮故陔切之使不失禮鄉飲酒鄉射燕禮
大射賓出之時皆云奏陔云公出入奏驚夏者大射云
公入驚是諸侯射於西郊入時奏驚夏不見出時而言
出者樂師行以王夏出入禮同則驚夏亦出入禮同故
兼云出也此九夏王夏惟天子得奏諸侯以下不得肆

夏則諸侯得奏故燕禮奏肆夏大夫以下不得故郊特牲云大夫奏肆夏由趙文子始其昭夏以下諸侯亦用之其驚夏天子大射入時無文故子春取大射公入驚以明天子亦用也愚按賈公彥云鐘中得奏九夏者謂堂上歌之堂下以鐘鼓應之故陳氏樂書云堂上堂下之樂兩者並用作方其工之升歌也搏拊而鐘磬作焉黃鐘之鐘鳴於堂上而堂下之編鐘應之黃鐘之磬鳴於堂上而堂下之編磬應之所以節歌者之句也先儒

說書笙鏞以間則曰堂上詠歌則堂下之樂不作堂下
奏樂則堂上之樂不作抑獨何邪今考舜典云歌永言
聲依永律和聲八音克諧而左傳云歌鐘二律又云金
奏肆夏則歌與鐘鼓並疏言是矣乃爲之賦曰

厥初玄黃之肇判兮圓至和之網緼大音隱於沖漠兮
聞窅然而無聞繫聖神之繼生兮泄堪輿之清淑聆玉
鸞之啾啾兮契中聲於嶰竹姬后儼而祇敬兮躋八埏
於時雍偉大武之有作兮神瞽聰而能調協兩間之沖

豫兮紛玉瑄於典同固濬哲之工巧兮道太和於王朝
展九夏以爲詩兮合登歌於金奏皇剡剡而進却兮曳
袞衣之委蛇駕六龍之蜿蜿兮齊玉軼而並馳奏首章
於王夏兮鳴笙鏞之參差靈氣冉其下征兮神洋洋乎
左右孰好修而主之兮忽奔走於先後陳肆夏而浩歌
兮竽瑟鏗其雜糅美騂犧之繭栗兮命續著爲予占之
曰薦是以明禋兮豈有神其舍之旣在滌之潔蠲兮昭
夏奏而來思百神續其並迎兮舞干翟之陸離集磬筦

之鏘鏘兮輅簡狄之新釐四國率其來賓兮冠岌岌而
偕至叩帝閭而開闢兮執玉帛而爲贊工歌納夏以延
之兮陳萬舞於其次無此疆而彼界兮懷秉彝之淵粹
惟爾甥舅叔父兮敵所愜而獻功宣昭明於章夏兮鳴
宮縣之編鐘列俘馘而充庭兮羣舞抃而從容迨肆筵
而燕樂兮錫秬鬯與彤弓魚軒招搖而戾止兮粲副禕
之姣服亶佐助於王侯兮執豆籩於瑤席靈連蜷而旣
留兮奠瑚璉於黍稷疏緩節於齊夏兮舞繽紛而繁飾

宗支衍而蕃碩兮侍孫子之振振族夏歌而應律兮鏘
瑤簫之鏗金嘉賓式燕而既醉兮羌屢舞之傲傲陔夏
以爲行節兮鳴鐘鼓而送之偕西階之踟躕兮聿折旋
於矩規八音紛以節奏兮實王心之所始猗嗟邦君之
郊射兮駕言邁而云返詠驚夏而容與兮珠累累而若
貫歛籥管而拊鼓兮颺翠旌之縵縵惟茲九頌之迭奏
兮與至尊而俱作侯庸肆以暨驚兮亦康娛而愉樂思
聖德之博大兮宣鬱闕於穹愕惜簡編之煨燼兮紛記

註之參錯何字文之郊兮嗤高齊以授私隋堅登歌以
皇夏兮法蒼籙而陳辭擬大明於螢燭兮測滄海於瓢
蠹紀班班於殺青兮貽來今之笑嗤惟聖元之涵煦兮
洽重熙於履載播繩音於樂歌兮極雄偉而宏大軼姬
周而過之兮翕五音之繁會抒菲言以作頌兮歌懿德
於時邁

御定歷代賦彙卷九十